

# A ILP DO BOSQUE CONSEGUE O APOIO MASIVO DA SOCIEDADE GALEGA

Cerna / Redacción

O pasado 22 de xuño, representantes da Comisión promotora da “Iniciativa Lexislativa Popular (ILP) para a protección e mellora dos hábitats de bosque autóctono, a racionalización da xestión do monte e a loita contra os incendios forestais”, e dos máis de 60 colectivos que integran a rede Cousa de Raíces e a Alianza Rural Galega, entregaron na Xunta Electoral de Galiza 42.561 sinaturas de apoio á ILP. Con este acto deuse por pechada a campaña a prol da chamada “ILP do bosque” na que se celebraron dúcias de actos e participaron milleiros de persoas e centos de colectivos de toda a xeografía galega.

Implicáronse nesta campaña colectivos de diferentes ámbitos, social, sindical, ecoloxista, produtivo, cultural, deportivo, feminista, político, etc. Á vista dos resultados, a ILP do bosque (a terceira no eido forestal galego) é unha das iniciativas legislativas populares máis apoiadas da historia democrática de Galiza e a máis amparada no eido ambientalista. Segundo as entidades promotoras, a proposición de lei conseguiu evidenciar a elevada preocupación da sociedade galega ante a problemática da eucaliptización, o abandono rural e os lumes forestais. Agora fan balanço da campaña e agardan a que os grupos parlamentarios admitan a debate a ILP no Parlamento Galego.

**“O debate do novo plano forestal no Consello Forestal de Galiza revelou que existe un lobby forestalista con intereses moi claros de arrasar o país con eucaliptos e cultivos enerxéticos” (Manuel Da Cal)**

A continuación, interveñen Xosé Alfredo Pereira (X.A.) pola Organización Galega de Montes en Man Común, Manuel Da Cal (M.D.) pola FRUGA, Fins Eirexas (F.E) por Cousa de Raíces e ADEGA e Paulo Carril (P.C.) pola CIG.

**Que valoración fan dos resultados da campaña da ILP?**

**X.A.** Quizais é a primeira vez que entidades que viven, traballan ou xestionan o medio rural e que non pensan exactamente igual son quen de sentarse e presentar unha ILP nese sentido. Superáronse as expectativas porque a acollida foi tremenda.

**M.D.** A presentación en si mesma da ILP xa supuxo un revulsivo no debate social sobre a situación pola que está atravesando o rural galego e permite trasladar ese debate ás persoas interesadas, damnificadas e afectadas. A resposta foi moi positiva

**F.E.** Foi un éxito, non só por ser unha das iniciativas legislativas populares de carácter ambientalista máis apoiada da historia democrática, senón pola enorme mobilización popular que suscitou e o enorme interese en colectivos afastados das coordenadas do movemento ecoloxista.

**P.C.** A nosa valoración é moi positiva. Conseguiuse demostrar a sensibilidade social que hai fronte ao eucalipto como símbolo do que é a destrución do noso rural e do medio natural. De feito, canto máis ía avanzando a campaña da ILP a prol do bosque autóctono e contra os incendios forestais, máis intensa se volveu tamén a campaña da pasteira ENCE e da propia Xunta para presentar o eucalipto como a única alternativa do monte e a salvación para o país.

**Que fixo que confluisen na mesma idea de monte colectivos de diversa índole?**

**M.D.** Primeiro, a orientación que estaba collendo o novo plano forestal



Representantes de Comisión Promotora da ILP entregan no Rexistro Electoral da Xunta as sinaturas de apoio á ILP.

no debate interno do Consello Forestal de Galiza, onde se revelou un lobby forestalista plenamente constituído, formalizado e con intereses moi claros de arrasar o país con eucaliptos e cultivos enerxéticos. E segundo, as plantacións simbólicas de eucaliptos que se deron na Muralla de Lugo e na Praza do Obradoiro de Santiago de Compostela, onde se viu un ambiente social que requiría unha contestación contundente ás propostas dese lobby forestalista.

**X.A.** As entidades promotoras compartimos a idea dun monte multifuncional e sustentable, que o seu aproveitamento cumpra as funcións económica, produtiva e social e que a grande beneficiada deste aproveitamento e desta posta en valor do rural sexa a base social deste país.



Mesa de recollida de sinaturas de apoio á ILP do bosque na Praza da Quintana de Compostela.

CIG



Mesa de recollida de sinaturas na Pobra de Trives.

**F.E.** Sempre houbo unha enorme sensibilidade social das galegas e galegos polas loitas ambientais ligadas a loitas sociais. Este é un deses casos. Por suposto, os lumes remexen conciencias, máis aínda despois do acontecido o pasado outubro con vítimas mortais. Esta problemática non é cuestión dunha minoría social, debíamos ultrapasar o eido ecoloxista. Esa idea, que subxace á rede "Cousa de Raíces", foi unha das chaves do éxito desta iniciativa.

**Cales son as propostas fundamentais desta ILP?**

**F.E.** Grande parte do articulado desta ILP pasa polo cumprimento de normas que xa estaban vixentes, como a Lei de Montes, a de prevención de incendios forestais ou o decreto de aproveitamento de eucalipto que impide que determinadas especies se planten en determinadas zonas.

**“Hai unha alternativa posible. Agora é cuestión de vontade política, entre defender os intereses de todas as galegas e galegos, ou unha política forestal destrutiva e que ten no lume o seu mellor aliado”**  
(Paulo Carril)

Incluso, o cumprimento do vello Plano Forestal de 1992, aínda vixente, que fixaba para 2032 unha extensión máxima de eucaliptos de 245.000 Ha (nestes momentos estamos abeirando as 600.000 Ha). Visaba tamén a realización dun catálogo e a avaliación das masas forestais autóctonas con obxectivos conservacionistas e produtivos que tampouco se fixo. Por outra banda, esta ILP inclúe novas normas nas coordenadas dun

ADEGA



A industria pasteira reforzou a súa campaña propagandística nos últimos meses.

CIG



Presentación da ILP do bosque na Casa da Cultura de Vigo, no mes de marzo.

aproveitamento sustentable e multifuncional (produtivo e non produtivo) do monte.

**P.C.** A nosa iniciativa aposta pola conservación, investigación e multifuncionalidade do monte, o incremento da xestión pública dos montes e o apoio e protección dos montes veciñais en man común; o freo aos cultivos de especies exóticas como o eucalipto, e as súas diferentes variedades, e a eliminación de plantacións ilegais; uns marcos mínimos de plantación, a rotura de masas mono específicas, a defensa das zonas de pastoreo para garantir a actividade do sector gandeiro e leiteiro; fomentar a posibilidade de que a silvicultura poida darse con madeiras de calidade e que teña que ser esa a aposta de futuro polo medio ambiente, pero tamén pola creación de emprego. Hai unha alternativa posible e é unha cuestión de vontade política entre defender os intereses de todas as galegas e galegos, ou unha política forestal destrutiva que acaba co rural, co medio ambiente e que ademais ten no lume o seu mellor aliado.

**Estamos nun momento decisivo para o futuro do monte galego?**

**X.A.** Estamos nun momento complicado porque o lobby forestalista está exercendo unha tremenda presión. Empresas da madeira, propietarios particulares, asociacións forestais, a sección forestal dalgúns sindicatos agrarios,... consideran que o monte galego debe estar ao servizo da industria e son maioría no Consello Forestal de Galiza. Esta ILP favorece a loita dos que pensamos que o monte debe estar ao servizo da sociedade e de que o territorio rural, ou é multifuncional e con xente dedicada a diversas actividades con servizos e explotacións, ou senón converterase nun deserto.

**F.E.** Si, estamos nun momento decisivo non só para o monte, senón tamén para o medio rural galego, e está sendo a sociedade a que toma a iniciativa. Estes tímidos intentos da Xunta por mudar o modelo forestal a

**“Hai unha estratexia tendente a roubar a xestión dos montes comunais aos seus titulares para entregarllos de balde á empresa privada. Buscan grandes extensións para plantacións mono específicas das pasteiras e de cultivos enerxéticos”**  
(Xosé Alfredo Pereira)

través dunha pequena revisión chegan tarde. O modelo forestal de 1992 fracasou absolutamente (ou iso é o que buscaba), non conseguiu limitar a expansión do eucalipto que xa conquistou todo tipo de hábitats, de interior e de alta montaña. E esta tardía reacción débese á presión que



No Día da Árbore, Cousa de Raíces convidou os centros de ensino a sumarse á causa na defensa do bosque galego.

desde outros eidos da sociedade (gremiais, produtivos, ecoloxistas,...) estamos facendo para que o noso mundo rural teña futuro. Se non abandonamos definitivamente o modelo perverso no que estamos agora seguirá habendo periodicamente lumes cada vez máis violentos que poden dar en perdas humanas.

**P.C.** É necesario non demorar máis en mudar de modelo porque a defensa do monte e a loita contra os incendios non teñen medidas con efectos inmediatos. Cada día que pase sen que as medidas desta ILP vaian adiante, máis difícil será revertir a precaria situación do noso monte.

### Cal é hoxe a situación do rural galego?

**M.D.** O rural está a quedar sen xente, e sen xente non é posible evitar ou combater os lumes. Esa realidade é aceptada por todo o mundo, incluso polos forestalistas. Necesitamos parar esta progresiva e constante perda de poboación do rural, e a partir de aí, ordenar o territorio e orientar os cultivos, a panacea que as organizacións agrarias nacionalistas vimos repetindo durante 40 anos. Se non se poñen os medios agora, estaremos trasladando o problema ás xeracións futuras.

**X.A.** En canto aos montes veciñais en man común, enfrontámonos a un futuro complicado. Desde que o PP retornou ao poder hai unha estratexia tendente a roubar a xestión destas terras aos seus titulares (veciñanza comuneira) para entregarllo de balde á empresa privada, que necesita terras para realizar plantacións mono específicas para pasteiras e para cultivos enerxéticos.

### O eucalipto era ata o momento un tema tabú no rural galego?

**M.D.** Como consecuencia do abandono do rural (programado desde os poderes públicos), produciuse unha invasión terrible de eucalipto, amparada pola campaña de promoción de Ence e da súa "flotilla", que se dedica a visitar as aldeas e parroquias do país. Xa era moi evidente que o país se estaba inzando de eucaliptos. A preocupación comezou en pequenos círculos sociais, pero logo foise cristalizando nunha contestación máis masiva. Ata agora era un tema do que se falaba, pero que non emerxía socialmente.

### O modelo que prodiga a ILP do bosque, que resultados agarda en xeración de emprego?

**P.C.** Dicir que a actual política forestal da Xunta crea emprego é unha barbaridade tan enorme como dicir que o mundo da droga e da delincuencia son bos porque xeran emprego. Non é verdade que a política forestal da Xunta xere emprego se o comparamos coa capacidade de

crear postos de traballo de moitas propostas que veñen nesta ILP. Esta ILP procura no monte e no bosque autóctono unha vía de asentamento da poboación rural, respecto ao medio ambiente e reordenación de espazos que permiten multiactividades económicas, non exclusivamente forestais e non agresivas co medio ambiente, coa actividade gandeira, leiteira, de horta, etc. A eucaliptización do país estase a facer á costa de prexudicar outras actividades e usos do territorio.

### Chegarase a debater a ILP do bosque no Parlamento galego?

**X.A.** Por sentido común, esta ILP debería ser debatida no Parlamento galego, pero a política de montes do partido maioritario é totalmente distinta ao que promulga esta ILP. Se cadra, nin tan sequera pase o trámite parlamentario. Ao lobby forestalista non lle interesa que se discuta una alternativa real para un medio rural galego vivo e onde os lumes forestais comecen a deixar de ser un problema.

**P.C.** Agardemos que non pase o mesmo que con outras iniciativas lexislativas presentadas pola CIG, como a ILP en defensa dunha tarifa eléctrica galega ou a ILP en defensa dos usos do galego, onde nos atopamos cun Parlamento de cartón que actúa en contra da vontade

### **“O modelo forestal imperante fracasou absolutamente, non conseguiu limitar a expansión do eucalipto que xa conquistou todo tipo de hábitats, de interior e de alta montaña” (Fins Eirexas)**

popular. Se o PP se nega a darlle trámite, estaríamos ante un novo exemplo de que as administracións non representan ao pobo e do carácter profundamente antidemocrático do PP, ademais de crear un dano grave para o país. Non debemos deixar de mobilizarnos.

**M.D.** Eu non son moi optimista. Coñecemos a posición do PP, pero a min preocúpame a posición doutras forzas parlamentarias como o PSdG ou En Marea, que están facendo de claque a ese lobby da madeira en foros organizados por fundacións como a de Juana de Vega, nos que participan Finsa ou Ence. Espero que saiban ler ben as demandas sociais e que non sexan reféns dese lobby da madeira.

**F.E.** Para nós, o obxectivo xa está conseguido: poñer o eucalipto e a problemática forestal na primeira liña das axendas políticas e sociais e atraer á causa da conservación dos bosques unha multitude de colectivos que non estaban necesariamente ligados ao movemento ecoloxista. O PP debería ser suficientemente sensible para, cando menos, non negarse a debater no Parlamento sobre outros modelos de monte. Neste senso, como xesto, unha toma en consideración desta ILP non sería descartable.



A campaña da ILP rematou na marcha reivindicativa contra as celulosas de Pontevedra.